

嘉慶廣陵事略

廣陵事略卷之二

歸安姚文田輯

周

魯哀公九年秋吳城邗溝通江淮

春秋左氏傳

楚懷王槐十年城廣陵

史記六國表

秦

二世元年七月陳涉等起大澤中廣陵人召平爲陳王徇廣陵

史記項羽紀

案資治

通鑑載入二世二年

漢

高祖三年嬰度淮盡降其城邑至廣陵

漢書灌嬰傳

六年正月立劉賈爲荆王

漢書高祖紀下案地理志廣陵國屬荆

劉賈高祖從父兄爲將軍有功立爲荆王王淮東六年而黥

布反東擊荆賈與戰弗勝走富陵爲布軍所殺

漢書賈本傳

項伯纏封射陽侯

史記高祖功臣侯表漢書師古注射或作賁後人改也

十一年秋淮南王英布反高帝自將往誅之荆王賈爲布所殺

無後乃立濞爲吳王

史記濞本傳

惠帝三年射陽侯纏卒子睢有罪國除

史記高祖功臣侯表

景帝三年春正月吳王濞膠西王卬楚王戊趙王遂濟南王辟

光菑川王賢膠東王雄渠皆舉兵反天子遣大尉亞夫大將軍

竇嬰將兵擊之

漢書景帝紀

孝惠高后時天下初定郡國諸侯各務自拊循其民吳有豫章郡銅山濞招致天下亡命者益鑄錢煮海水爲鹽以故無賦國用富饒孝文時吳太子入見侍皇太子博爭道不恭皇太子引博局提吳太子殺之吳王由此稱病不朝京師知其以子故驗問實不病諸吳使來輒繫責治之吳王恐爲謀滋甚及後使人爲秋請上復責問使者使者對曰王實不病漢繫治使者數輩以故稱病且察見淵魚不祥惟上棄之而與更始天子乃赦吳使者歸之而賜王几杖老不朝吳得釋罪謀亦益解鼂錯爲太子家令數言吳過可削文帝不忍及孝景卽位錯說上削楚吳趙膠西地吳王乃使中大夫應高誂

膠西王身自爲使於膠西面結之遂發使約齊菑川膠東濟南濟北皆許諾齊王後悔飲藥自殺濟北城壞未完其郎中令劫守其王不得發兵膠西爲渠率膠東菑川濟南共攻圍臨菑趙王遂亦反陰使匈奴與連兵吳王下令國中曰寡人年六十二身自將少子年十四亦爲士卒先諸年上與寡人比下與少子等者皆發發二十餘萬人南使閩越東越東越亦發兵從三年正月甲子起兵於廣陵西涉淮因并楚兵天子乃遣太尉周亞夫將三十六將軍往擊吳楚遣曲周侯鄺寄擊趙將軍爰布擊齊大將軍竇嬰屯滎陽監齊趙兵嬰未行言故吳相袁盎盎時家居召入見問計盎言獨斬錯復削

地兵可罷乃拜益爲太常使吳

史記漢本傳

竇嬰字王孫觀津

人孝文時爲吳相病免吳楚反上察宗室諸竇無如嬰賢拜

大將軍七國破封魏其侯

漢書嬰本傳

袁盎字絲楚人徙安陵

孝文時爲吳相告歸吳楚反盎以泰常使吳吳王使將不肯

欲殺之使一都尉以五百人固守盎盎爲吳相時從史盜私

盎侍兒盎遂以賜之及盎見守從史適在守盎校爲司馬乃

悉以其裝齎買二石醇醪醉西南陬卒引盎出歸報

漢書盎本傳

鄒陽齊人吳王濞招致四方游士陽與嚴忌枚乘等俱仕吳

以文辨著名吳王以太子事怨望陰有邪謀陽奏書諫不內

去之梁

漢書陽本傳

枚乘字叔淮陰人爲吳王濞郎中吳王之

初怨望謀為逆也乘奏書諫不內去之梁景帝即位鼂錯為

漢定制度損削諸侯吳王遂與六國謀反乘復說吳王王不

用卒見禽滅乘由是知名

漢書乘本傳

二月諸將破七國斬首十餘萬級追斬吳王濞於丹徒

漢書景帝紀

六月徙汝南王非為江都王王故吳地

通鑑漢紀八案史記漢興以來諸侯年表作

徙四年

武帝元朔元年十二月江都王薨

漢書武帝紀

二年江都王建嗣

漢書諸侯王表案表云江都易王立二十八年徙易王傳作二十七年考非於景帝二

年封汝南三年徙江都言二十八年者合汝南言之也建於元年嗣位翁上繫易王故以二年為始也

四年三月封城陽共王子襄為廣陵侯

漢書王子侯表案案史記作表又案元朔

四年爲江都王建之三年是時又置廣陵侯其疆域分析史文無考

元狩二年江都王建有罪自殺漢書武帝紀

建與易王所愛淖姬等十人姦女弟徵臣以易王喪來歸復

與姦游章臺宮令四女子乘小船以足蹈覆其船四人皆溺

二人死復游雷波師古曰波讀爲陂天大風使郎二人乘小船入波

中船覆兩郎溺攀船乍見仁沒建臨觀大笑令皆死凡殺不

辜三十五人專爲淫虐自知罪多恐誅與其后成光共使越

婢下神咒詛上聞淮南衡山陰謀遂作兵器刻皇帝璽事覺

有司請捕誅建自殺后成光等皆棄市國除地入於漢爲廣

陵郡漢書江都易王傳

五年廣陵侯裘薨侯成嗣

漢書王子侯表案裘立七年薨當在元符四年表言五年者成之始年

也

六年立皇子胥爲廣陵王

漢書武帝紀案胥王江都故地時爲廣陵侯成之二子

元鼎五年廣陵侯成坐酎金國除

史記建元以來王子侯表

宣帝五鳳四年春正月廣陵王胥有罪自殺

漢書宣帝紀

昭帝時胥見上年少無子有覬欲心迎女巫李女須使下神

祝詛宣帝卽位乃止後胥子南利侯寶坐殺人奪爵還廣陵

與胥姬左修姦棄市相勝之奏奪王射陂草田以賦貧民奏

可胥復使巫祝詛如前事覺藥殺巫及宮人二十餘人以絕

口公卿請誅胥天子遣廷尉大鴻臚卽訊胥謝曰罪死有餘

誠皆有之事久遠請歸思念具封胥既見使者還置酒顯陽

殿召太子霸及子女等夜飲使所幸郭昭君等鼓瑟歌舞王

自歌左右悉涕泣至鷄鳴時罷卽以綬自絞死天子加恩赦

王諸子爲庶人諡曰厲王國除

漢書胥本傳

元帝初元二年三月立廣陵厲王太子霸爲王

漢書元帝紀案國除凡七年

建昭五年廣陵王霸薨共王意嗣

漢書諸侯王表攷表及厲王傳皆云霸封十三年薨當

在建昭三年其明年卽爲共王元年不當云五年傳寫有誤案霸諡孝王

成帝建始二年廣陵王意薨哀王護嗣

同上案厲王傳云意嗣三年薨表作十三年

當衍十字

廣陵王護薨亡後

同上案護當薨於鴻嘉四年故次於此據厲王傳云護嗣十六年薨表作十五年傳又

云絕後六年成帝復立孝王子守是為靖王自建始二年至鴻嘉四年凡十五年下距元延二年正得六年是傳誤也

元延二年夏四月立廣陵孝王子守為王

漢書成帝紀

王莽居攝二年廣陵王守薨王宏嗣

漢書諸侯王表案表云靖王守封十七年薨厲王

傳作二十年則已及莽篡之後不得云子宏嗣王莽時絕也當從表為正又案江都易王傳云平帝時王莽秉政與滅繼絕立建弟盱眙侯子宮為廣陵王奉易王後莽篡國絕考宮封時正當靖王之世是二廣陵王矣平帝紀元始二年立江都易王孫盱眙侯子宮為廣川王不言廣陵諸侯王表又作廣世川世形近傳寫必有一誤要之非廣陵則可無疑也

明帝永平元年八月徙山陽王荆為廣陵王遣就國

後漢書明帝紀

十年春二月廣陵王荆有罪自殺國除

同上

荆冀天下有變私迎能為星者與謀議帝聞之乃徙荆廣陵後猶不改使巫祭祀祝詛有司舉奏請誅之荆自殺帝憐傷

之謚曰思王

後漢書
荆本傳

十四年夏五月封故廣陵王荆子元壽為廣陵侯

後漢書
明帝紀

元壽為廣陵侯服王璽綬食荆故國六縣元壽卒子商嗣商

卒子條嗣傳國於後

後漢書廣陵思王傳 案郡國志廣陵
郡十一縣元壽所食六縣史文不具傳

商及條亦無年次可攷 又案楊終傳云建初元年大旱穀
貴終以為廣陵楚淮陽濟南之獄徙者萬數吏民怨曠乃上
疏帝從之聽還徙者攷帝紀建初二年詔還坐楚淮陽事徙
者四百餘家不言廣陵蓋思王前已積封當時本未考極其
事非若楚淮陽之窮治累年
死徙甚眾終特連及之耳

順帝永和三年夏四月九江賊蔡伯流寇郡界及廣陵殺江都

長

後漢書
順帝紀

漢安元年九月廣陵盜賊張嬰等寇郡縣是歲詣太守張綱降

上同

冲帝永嘉元年張嬰等復反攻殺堂邑江都長冬十一月中郎

將滕撫擊嬰破之

後漢書
質帝紀

廣陵賊張嬰復聚眾數千人反據廣陵太后以徐揚盜賊益熾博求將帥三公舉涿令北海滕撫有文武才詔拜撫九江都尉與中郎將趙序助馮緄合州郡兵數萬人討之三月撫等進擊眾賊大破之夏五月拜撫中郎將督徐揚二州事九月撫進擊嬰冬十一月破嬰斬獲千餘人

通鑑漢紀
四十四

滕撫

字叔輔北海劇人爲涿令七年道不拾遺徐揚盜賊羣起三公舉撫爲九江都尉又拜中郎將督徐揚二州事擊賊悉平

以撫爲左馮翊撫性方直不交權勢宦官懷忿及論功當封

太尉胡廣承旨奏黜撫天下怨之

後漢書
撫本傳

質帝本初元年春正月廣陵太守王喜坐討賊逗遛下獄死

後漢

書質
帝紀

桓帝延熹九年沛國戴異得黃金印無文字遂與廣陵人龍尙

等共祭并作符書稱太上皇伏誅

後漢書桓帝紀 東觀記曰
戴異鉏田得金印到廣陵以

與龍尙見

本卷注

獻帝初平元年關東州郡起兵討董卓廣陵太守超屯酸棗

通鑑

漢紀五

十一

張超東平壽張人靈帝時爲廣陵太守董卓圖危社稷功曹

臧洪說超倡義超然其言西至陳畱見兄邈計事邈謂超曰
聞弟爲郡守政教威恩不由已出動任臧洪洪者何人超曰
洪才略智數優超海內奇士也邈引見洪大異之致之劉岱
孔仙乃糾合義兵同赴國難

事見三國志臧洪傳

四年徐州治中王朗別駕趙昱說刺史陶謙遣使奉貢詔拜謙
徐州牧加安東將軍封溧陽侯以昱爲廣陵太守朗爲會稽太

守

通鑑漢紀五十二

是時徐方百姓殷盛穀實甚豐流民多歸之而謙信用非所
刑政不理同郡人笮融聚眾數百往依於謙謙使將廣陵下
邳彭城邳繡遂斷三郡委輸大起浮屠寺每浴佛就食及觀

者萬餘人及曹操擊謙徐方不安融乃將男女萬口馬三千匹走廣陵太守趙昱待以賓禮融利廣陵資財遂殺昱放兵

大掠

後漢書
陶謙傳

孫策渡江居江都徐州牧陶謙深忌策策舅吳景時爲丹陽太守策乃載母徙曲阿與呂範孫河俱就景

吳志孫
策傳

策在江都時張紘有母喪策數詣紘咨以世務紘見策忠壯內發辭介慷慨感其志言乃答曰君紹先侯之軌有驍武之名若投丹陽收兵吳會則荆揚可一讎敵可報據長江奮威德誅除羣穢匡輔漢室功業侔於桓文豈徒外藩而已哉策

曰今便行矣

同上注
引吳縣

興平二年策渡江攻破海陵

同上注引江表傳案是時劉孫逐吳景據曲阿別將屯於海陵

建安二年沛相陳珪使子登詣曹操操拜登廣陵太守

通鑑漢紀五十

四

袁術遣韓允以僭號事告布因求迎婦陳珪恐徐揚台從爲難未已往說布絕婚珪欲使子登詣曹操布固不許會使至拜布左將軍布大喜卽聽登行并令奉章謝恩登見操因陳布勇而無謀輕於去就宜早圖之操卽增珪秩中二千石拜登廣陵太守令陰合部眾以爲內應

後漢書呂布傳

三年冬十月操屠彭城廣陵太守陳登率郡兵爲先驅以功加

伏波將軍

通鑑漢紀五十四

五年廣陵太守陳登治射陽

通鑑漢紀五十五

十八年曹公攻濡須權與相拒月餘曹公恐江濱郡縣爲權所略徵令內移民轉相驚自廬江九江斬春廣陵戶十餘萬皆東渡江江西遂虛

吳志孫權傳

三國

文帝踐阼張遼等至廣陵討孫權臨江夜大風吳將呂範等船漂至北岸凌與諸將逆擊捕斬首虜獲舟船

魏志王凌傳

黃初元年郭淮封射陽亭侯

魏志淮本傳

二年遼屯雍邱得疾帝迎遼就行在所疾小差還屯孫權復叛

追遼乘舟與曹休至海陵病遂篤薨於江都

魏志張遼傳

五年八月爲水軍親御龍舟循蔡賴浮淮幸壽春揚州界九月

遂至廣陵冬十一月還許昌

魏志文帝紀

六年八月帝以舟師自譙循渦入淮從陸道幸徐冬十月行幸

廣陵故城臨江觀兵戎卒十餘萬旌旗數百里

同上

帝如廣陵有渡江之志吳人嚴兵固守時大寒冰舟不得入

江帝見波濤洶湧嘆曰嗟乎固天所以限南北也遂歸

通鑑魏紀

二 車駕至廣陵濟表水道難通帝不從於是戰船數千皆

滯不得行還到精湖水稍盡盡留船付濟濟鑿地作四五道

蹴船令聚豫作土脉遏斷湖水皆引後船一時開過入淮中

魏志

濟傳

嘉禾三年五月遣孫韶張承等向廣陵淮陽

吳志孫權傳案
宋書天文志亦作

淮陽通鑑

作淮陰

五鳳二年七月使衛尉馮朝城廣陵

吳志孫
亮傳

孫峻欲城廣陵朝臣知其不可城而畏之莫敢言惟滕允諫

止不從功竟不就

吳志孫
峻傳

太平元年春二月朔峻用征北大將軍文欽計將征魏八月先

遣欽及驃騎呂據車騎劉纂鎮南朱異前將軍唐咨自江都入

淮泗九月丁亥峻卒以從弟綝爲侍中武衛將軍領中外軍事

據等聞綝代峻大怒表薦衛將軍滕允爲丞相綝更以允爲大

司馬代呂岱據引兵還欲討綝綝遣孫憲及丁奉施寬等以舟

兵逆據於江都

吳志孫亮傳

案呂範孫綝傳憲並作慮攷孫

權子慮字子智封建昌侯假節開府嘉禾元年卒峻弟似不應與之同名

疑亮傳爲正通鑑亦作憲

高貴鄉公甘露三年二月陳騫進爵廣陵侯

晉書騫本傳

案騫進封年月據魏

志諸葛誕

傳編入

周浚爲揚州刺史封射陽侯

晉書浚本傳

案浚封年月無攷

據傳乃仕魏時事姑次三國之末

晉

武帝太康十年十一月封皇孫通爲廣陵王琅邪王弟湛爲廣

陵公

晉書武帝紀

通幼而聰慧武帝愛之時望氣者言廣陵有天子氣故封爲

廣陵王

晉書愍懷太子傳

惠帝永熙元年八月立廣陵王遹為皇太子

晉書惠帝紀

太尉陳準封廣陵郡公

魏志陳泰傳注 據宋書荀伯子傳及通鑑準當封於惠帝永康元年故次於

此準宋書作淮蓋準字之誤 又案晉書石勒載記有廣陵公陳軫未詳所出附錄於此

永寧元年六月進廣陵公湛爵為王

通鑑晉紀六

三王起義湛與王輿攻殺孫秀因而廢倫以功進封淮陵王

晉書宣

五王傳

太安二年五月義陽蠻張昌舉兵反七月昌別帥石冰寇揚州

十一月揚州秀才周玘前南平內史王矩前吳興內史顧祕起

義軍討冰冰退自臨淮趣壽陽征東將軍劉準遣廣陵度支陳

敏擊冰

晉書惠帝紀

永興元年二月陳敏與石冰戰所嚮皆捷三月揚徐二州平以

敏爲廣陵相

通鑑晉紀七

陳敏旣克石冰自謂勇略無敵有割據江東之志其父怒曰滅我門者必此兒也遂以憂卒敏以喪去職司空越起敏爲右將軍前鋒都督越爲劉祐所敗敏請東歸收兵遂據歷陽

叛

通鑑晉紀八

二年陳敏反於揚州吳興人錢璦起義兵討敏命爲建武將軍使率其屬會京都璦至廣陵聞劉聰逼洛陽畏悞不敢進帝促以軍期璦乃謀反玘率合鄉里義眾進討璦斬之

晉書周北傳案敏反從

帝紀編入此年

愍帝建興元年左丞相睿遣世子紹鎮廣陵以丞相掾蔡謨爲

參軍

通鑑晉紀十

元帝建武元年三月立世子紹爲皇太子封哀爲琅邪王奉恭

王後仍以哀都督青徐兗三州諸軍事鎮廣陵

通鑑晉紀十二

明帝太寧二年王敦舉兵內向徵奮衛將軍廣陵太守陶瞻等

還衛京師

晉書明帝紀

成帝咸和二年十一月祖約蘇峻等反車騎將軍郗鑒遣廣陵

相劉矩帥師赴京師

晉書成帝紀

郗鑒字道徽高平金鄉人明帝時遷車騎將軍都督徐兗青

三州軍事兗州刺史假節鎮廣陵咸和初領徐州刺史約峻

反鑒聞難便欲東赴詔以北寇不許於是遣司馬劉矩領三千人宿衛京師詔進鑒爲司空鑒去賊密邇城孤糧絕人情業業莫有固志奉詔流涕設壇場刑白馬大誓三軍登壇慷慨

三軍爭爲用命

晉書鑒本傳

穆帝永和五年二月征北大將軍褚裒北伐秋七月進次彭城遣部將王龕李邁及石遵將李農戰於代陂王師敗績八月裒

退屯廣陵

晉書穆帝紀

裒以授任失所威略虧損上疏自貶求留鎮廣陵詔使還鎮

京口

晉書裒本傳

案裒傳王龕作徐龕李農作李菟石季龍載記與帝紀同疑裒傳誤

廢帝太和四年夏四月大司馬桓溫帥眾伐慕容暉九月至枋

頭以糧運不繼焚舟而歸慕容垂追敗溫後軍於襄邑冬十月
溫收散卒屯於山陽十一月溫自山陽及會稽王昱會於涂中
將謀後舉十二月遂城廣陵而居之

晉書廢
帝紀

五年大司馬溫自廣陵帥眾二萬討袁瑾敗瑾於壽春

通鑑晉
紀二十

四

六年十一月桓溫自廣陵屯於白石

晉書廢
帝紀

簡文帝咸安二年六月前護軍將軍庾希舉兵反自海陵入京

口桓溫遣東海內史周少孫討擒之斬於建康市

晉書簡
文帝紀

孝武帝太元四年五月秦兵六萬圍幽州刺史田洛於三阿去
廣陵百里朝廷大震臨江列戍兗州刺史謝元自廣陵救三阿

大破之

通鑑晉紀二十六 案晉書天文志云升平四年四月賊聚廣陵三河聚五六萬六月兗州刺史謝元討賊大

破之三河當作三阿元於太元二年爲兗州刺史不當前十餘年便有討賊之事知升平爲太元之誤與此實是一事宋書天文志

不誤

謝元字幼度少爲叔父安所重時苻堅強盛邊境數被侵寇朝廷求文武良將可鎮禦者安以元應舉拜建武將軍兗州刺史領廣陵相監江北諸軍事堅將句難毛當圍三阿元自廣陵西討與賊大戰破之加領徐州刺史還廣陵封東興縣侯及堅率兵次項城眾號百萬元先遣廣陵相劉牢之五千入直指洛澗生擒堅將收其軍實堅進屯壽陽列陣臨肥水元以精銳八干涉肥水決戰堅中流矢眾奔潰以勲封康樂

縣公晉書元本傳

十年會稽王道子好專權與太保安有隙安欲避之會秦王堅來求救安乃請自將救之出鎮廣陵之步邱築壘曰新城而居之通鑑晉紀二十八

安帝隆安四年六月盧循陷廣陵死者三千餘人晉書安帝紀案宋書天

文志事在隆安五年通鑑從之

元興元年桓元將行篡逆誅不附已者廣陵相高雅之江都長

張誕內不自安皆奔於德晉書慕容德記案劉敬宣傳作奔慕容超誤

二年十二月高祖與弟道規浦國劉毅平昌孟昶謀時桓宏爲

青州刺史鎮廣陵道規爲宏中兵參軍昶爲州主簿乃令毅潛

往就昶聚徒江北起兵殺宏

宋書武帝紀上

三年二月昶勸宏出獵未明開門出獵人昶道規毅等率壯

士五六十人因開門直入宏方噉粥卽斬之因收眾濟江

同上

義熙八年劉毅疾篤郗僧施等恐毅死其黨危乃勸毅請從弟

兗州刺史藩以自副太尉裕僞許之藩自廣陵入廟裕以詔書

罪狀毅云與藩及謝混共謀不軌收藩及混賜死

通鑑晉紀三十八

十年司馬國璠兄弟聚眾數百潛渡淮夜入廣陵城青州刺史

檀祗領廣陵相國璠兵直上聽事祗驚出將禦之被射傷而入

謂左右曰賊乘闇得入欲掩我不備但擊五鼓彼懼曉必走矣

左右如其言國璠兵果走追殺百餘人

同上

宋

武帝永初三年三月檀道濟出爲鎮北將軍南兖州刺史鎮廣

陵悉監淮南諸軍

通鑑宋紀一

少帝景平元年虜圍青州刺史竺夔於東陽城加道濟使持節
監征討諸軍事與王仲德救東陽未至虜燒營焚攻具遁走將
追之城內無食乃開窖取久穀窖深數丈出穀作米已經再宿

虜去遠不可追乃還鎮廣陵

宋書檀道濟傳

文帝元嘉四年八月太傅長沙景王神主隨子南兖州刺史義

興

當作欣

鎮廣陵備所加殊禮下船及至鎮入行廟

宋書禮志二

七年三月詔右將軍到彥之統舟師入河又使驍騎將軍段宏

將精騎直指虎牢豫州刺史劉德武將兵繼進後將軍長沙王
義欣監征討諸軍事出鎮彭城爲眾軍聲援以游擊將軍胡藩

戍廣陵行府州事

通鑑宋紀三

二十年夏四月立皇子誕爲廣陵王

宋書文帝紀

二十六年以廣陵王誕爲雍州刺史改封隨郡王

同上時以廣陵彫弊故

改封

二十七年大舉北討以兵力不足尚書左僕射何尙之參議發
南兖州三五民丁父祖伯叔兄弟仕州居職從事及仕北徐充
爲皇弟皇子從事庶姓主簿諸皇弟皇子府參軍督護國三令
以上相府舍者不在發例其餘悉倩暫行征符到十日裝束緣

江五郡集廣陵

宋書索虜傳

十一月魏主攻彭城不克十二月引兵南下使中書郎魯秀出

廣陵

通鑑宋紀七 案秀前封廣陵侯乃東豫州之廣陵故不錄

車駕臨江起行宮於瓜步山永昌王仁自歷陽至於江西高涼

王那自山陽至於廣陵諸軍皆同日臨江所過城邑莫不望塵

奔潰

魏書太武紀下

二十八年春正月魏人緣江舉火掠居民焚廬舍而去

通鑑宋紀八

拓跋燾率眾數十萬南山後無資糧惟以百姓爲命及過淮

食平越石髓二屯穀至是抄掠無所人馬飢困聞盱眙有積

粟欲以爲歸路之資正月燾自廣陵北返悉力攻盱眙

宋書臧質

傳

初太祖聞虜寇逆焚燒廣陵城府船乘使廣陵南沛二

郡太守劉懷之率人民渡江虜以海陵多陂澤不敢往山陽

太守蕭僧珍亦斂居民及流奔百姓悉入城有白米陂

米疑當作

水

去郡數里僧珍逆下諸處水注令滿須賊至決以灌之虜

不敢停引去自廣陵還攻盱眙不克乃燒攻具退走燹凡破

南兗徐兗豫青冀六州殺略不可勝計而其士馬死傷過半

國人並尤之

宋書索虜傳

魏主所過赤地無餘春燕歸巢於林

木

通鑑宋紀八

江夏王義恭鎮彭城虜退走自彭城北過義恭

不敢追其日民有告虜驅廣陵民萬餘口夕應宿安王陂去

城數十里今追之可悉得諸將並請義恭不許經宿太祖遣

驛至使悉力急追虜先已聞知盡殺所驅廣陵民輕騎引去

宋書義

恭本傳

孝武孝建二年秋七月立皇弟休茂爲海陵王

宋書孝武帝紀

大明元年八月司空南徐州刺史竟陵王誕改爲南兖州刺史

同上

二年發民治廣陵城

宋書竟陵王傳

誕循行有人干輿揚聲罵曰大兵尋至何以辛苦百姓誕執

之問其本末答曰姓夷名孫家在海陵天公去年與道佛共

議欲除此間民人道佛苦諫得止大禍將至何不立六慎門

誕問云何答曰古詩有言禍不入六慎門誕以其言狂悖殺

之又五音士忽狂易見鬼驚怖啼哭曰外軍圍城城上張布

白帆誕執錄二十餘日乃赦之

同上

廣陵城南門舊不開云

開南門者不利其主至誕乃開焉

同上

三年夏四月司空南充州刺史竟陵王誕有罪貶爵誕不受命

據廣陵城反殺兖州刺史垣閭以始興公沈慶之爲車騎大將

軍開府儀同三司南充州刺史討誕

宋書孝武帝紀

誕知上意忌之潛爲之備因魏人入寇修城浚隍聚糧治仗

時道路皆云誕反會吳郡民劉成上書稱息道龍昔事誕見

誕在石頭城修乘輿法物習唱警蹕道龍憂懼私與伴侶言

之誕殺道龍又豫章民陳談之上書稱弟詠之在誕左右見

誕疏陛下年紀姓諱往巫鄭師憐家祝詛詠之密以啓聞誕
誣詠之乘酒罵詈殺之上乃令有司奏誕罪惡請收付廷尉
治罪詔貶誕爵爲侯遣之國詔書未下先以羽林禁兵配兗
州刺史垣閭使以之鎮爲名與給事中戴明寶襲誕聞至廣
陵誕未悟也明寶夜報誕典籤蔣成使明晨開門爲內應成
以告舍人許宗之宗之告誕誕驚起呼左右及素所蓄養數
百人執蔣成勒兵自衛天將曉明寶與閭帥精兵數百人猝
至而門不開誕已列兵登陴自在門上斬蔣成赦作徒繫囚
開門擊閭殺之明寶從間道逃還詔以沈慶之爲南兗州刺
史將兵討誕誕焚郭邑驅居民悉使入城閉門自守分遣書

檄邀結遠近時山陽內史梁曠家在廣陵誕執其妻子遣使邀曠曠斬使拒之誕怒滅其家誕奉表投之城外曰陛下信用讒言遂令無名小人來相掩襲不任枉酷卽加誅翦雀鼠貪生仰違詔敕又曰陛下官帷之醜豈可三緘上大怒凡誕左右腹心同籍期親在建康者並誅之死者以千數慶之至城下上慮誕奔魏使慶之斷其走路慶之移營白土又進軍新亭豫州刺史宗慤徐州刺史劉道隆並帥眾來會兗州刺史沈僧明慶之兒子也亦遣兵助誕見眾軍大集欲棄城北走畱中兵參軍申靈賜守廣陵自將步騎數百人親信並自隨聲云出戰邪趣海陵道慶之遣龍驤將軍武念追之誕行

十餘里眾皆不欲去互請還城誕曰我還易耳卿能爲我盡力乎眾皆諾誕乃復還築壇歃血以誓眾凡府州文武皆加秩右衛將軍垣護之虎賁中郎將殷孝祖等擊魏還至廣陵上並使受慶之節度慶之進逼廣陵城上命爲三烽於桑里克外城舉一烽克內城舉兩烽擒誕舉三烽璽書督趣前後相繼慶之焚其東門塞塹造攻道立行樓土山并諸攻具值久雨不得攻城上使御史中丞庾徽之奏免慶之官詔弗問以激之自四月至七月雨止城猶未拔上將自濟江討誕慶之身先士卒親犯矢石克其外城乘勝而進又克小城誕聞兵入走趨後園隊主沈允之等追及之擊傷誕墜水引出斬

之誕母妻皆自殺詔貶姓畱氏廣陵城中士民無大小悉命殺之慶之請自五尺以下全之其餘男子皆死女子以爲軍賞猶殺三千餘口上聚其首於石頭南岸爲京觀侍中沈懷文諫不聽

通鑑宋紀十一

卜天生爲西陽王子尙撫軍參軍加龍

驤將軍隸沈慶之攻廣陵城天生推車塞塹率數百人先登西北角徑至城上賊爲重柵斷攻道苦戰移日不拔乃還詔

賜布千匹以厲眾校

宋書孝義傳

沈慶之字宏先吳興武康人

世祖踐阼爲使持節督南兖豫徐兗四州諸軍事南兖州刺史鎮廣陵進開府儀同三司封始興郡公以年滿七十辭事就第大明三年竟陵王誕據廣陵反復以慶之爲南兖州刺

史率眾討之至歐陽誕遣客沈道愍齎書說慶之餉以玉環
刀慶之遣道愍反數以罪惡詎餉慶之食提挈者百餘人慶
之悉焚之誕於城上函表倩慶之爲送慶之曰我奉詔討賊
不得爲汝送表每攻城輒身先士卒自四月至七月乃斬誕
進慶之司空

宋書慶之
之本傳

賀弼字仲輔會稽山陰人有文才爲

竟陵王誕記室參軍誕據廣陵叛弼固諫再三誕怒抽刃向
之乃止或勸出降弼曰公舉兵向朝廷此事旣不可從荷公
厚恩又義無違背惟當死明心耳乃服藥自殺贈車騎將軍
山陽海陵二郡太守

事見宋書
竟陵王傳

劉琨之遵考子爲竟陵王

誕主簿誕以爲中兵參軍弼曰忠孝不得並琨之老父在不

敢承命誕囚之十餘日終不受乃殺之贈給事黃門侍郎事見

通鑑宋

紀十一

七年二月與駕巡南豫兗二州冕服御玉路辵二廟改服通天

冠御木路大麾備春蒐之典

宋書禮志五

明帝泰始二年三月薛索兒將馬步萬餘人自睢陵渡淮進逼

青冀二州刺史張永營詔南徐州刺史桂陽王休範統北討諸

軍事進據廣陵又詔蕭道成將兵救永

通鑑宋紀十三

薛索兒擊破臺軍主高道慶走之於石籠

南齊書高帝紀上

泰始三年八月以中領軍沈攸之行南兗州刺史率眾北討

宋書

明帝紀

六年南兖州刺史蕭道成在軍中久民間或言道成有異相嘗爲天子上疑之徵爲黃門侍郎越騎校尉道成懼不欲內還而無計得留冠軍將軍廣陵荀伯玉勸道成遣數十騎入魏境安置標榜魏果遣遊騎數百履行境上道成以聞上使道成復本任秋九月遷鎮淮陰以待中中領軍劉劭爲都督南徐兖等五

州諸軍事鎮廣陵

通鑑宋紀十四

戴僧靜還淮陰太祖撫畜之常在左右僧靜於都載錦出爲歐陽戍所得繫兖州獄太祖遣薛淵餉僧靜酒食以刀子置魚腹中僧靜與獄吏飲酒旣醉以刀刻械手自折鎖發屋而

出歸太祖匿之齋內

南齊書僧靜傳

南齊

高帝建元元年六月立皇子鑑爲廣陵王

南齊書高帝紀下

十一月魏遣假梁郡王嘉督二將出淮陰隴西公琛督三將出廣陵河東公薛虎子督三將出壽陽奉丹陽王劉和入寇許和以克復舊業世胙江南稱藩於魏南兗州刺史王敬則聞魏將濟淮委鎮還建康士民驚散旣而魏竟不至

通鑑齊紀一

三年領軍將軍李安民左軍將軍孫文顯與虜軍戰於淮陽大敗之初虜寇至緣淮驅略江北居民猶懲佛狸時事皆驚走不可禁止乃於梁山置一軍南置三軍慈姥置一軍涖州置二軍三山置二軍白沙洲置一軍蔡洲置五軍長蘆置三軍菰浦置

二軍徐浦置一軍內外悉班階賞以示威刑

南齊書
魏虜傳

海陵王延興元年九月遣平西將軍王廣之誅南兖州刺史安

陸王子敬

南齊書海
陵王紀

蕭鸞遣王廣之襲子敬廣之至歐陽遣部將濟陰陳伯之先

驅伯之因城開獨入斬子敬

通鑑齊
紀五

冬十月詔廣陵年常遞出千人以助淮戍並可長停

南齊書海
陵王紀

皇太后令帝降封海陵王

同上

明帝建武二年虜盛詔瓌以本官假節督廣陵諸軍事行南兖

州事虜退乃還

南齊書
張瓌傳

蕭穎胄爲廣陵太守行南兖州事虜揚聲當飲馬長江敕穎胄

移居民入城百姓驚恐席卷欲南渡穎冑以賊勢尙遠不卽施

行虜亦尋退

南齊書穎冑本傳

東昏侯永元二年夏四月崔慧景於廣陵舉兵襲京師

南齊書東昏侯

紀

帝旣誅戮將相舊臣皆盡慧景自以年宿位重轉不自安明年裴叔業以壽春降虜改授慧景平西將軍假節侍中護軍如故率軍水路征壽陽軍頓白下將發帝長圍屏除出現邪城送之帝戎服坐城樓上召慧景單騎進圍內無一人目隨者裁交數言拜辭去慧景旣得出甚喜子覺爲直閣將軍慧景密與期四月慧景至廣陵覺便出奔慧景過廣陵數十里

召會諸軍主曰吾荷三帝厚恩當顧託之重幼主昏狂朝廷
壞亂危而不扶責在今日欲與諸軍共建大功以安宗社何
如眾皆響應於是回軍還廣陵司馬崔恭祖守廣陵城開門
納之帝聞變以征虜將軍右衛將軍左興盛假節督京邑水
陸眾軍慧景停二日便收眾濟江集京口江夏王寶元又爲

內應合二鎮兵力奉寶元向京師

南齊書慧景本傳

豫州刺史蕭懿起義救援慧景棄眾走斬首

南齊書東昏侯紀

崔慧景之平曲赦都下及南充州本以宥賊黨而羣凶用事
刑辟不依詔書無罪家富者不論赦令莫不受戮籍其家產

與慧景深相關爲盡力而家貧者一無所問

南史茹法珍傳

和帝中興元年蕭衍遣從弟寧朔將軍景鎮廣陵

通鑑齊紀十

初義師之逼東昏遣軍主左僧慶鎮京口常僧景鎮廣陵李

叔獻屯瓜步及申胄自姑孰奔歸又使屯破墩以爲聲援至

是高祖遣使曉喻並率眾降乃遣從弟景鎮廣陵

梁書武帝紀上

梁

武帝太清元年三月魏侯景以西豫廣潁等十三州內附八月

乙丑下詔大舉伐東魏遣南豫州刺史貞陽侯淵明南兖州刺

史南康王會理分督諸將

通鑑梁紀十六

二年八月侯景反十二月南康王會理入援景以封山侯正表

爲南兖州刺史會理使廣陵令劉詢襲破之

通鑑梁紀十七會理傳詳後

侯景至建康北徐州刺史封山侯正表鎖鍾離上召之入援
正表託以船糧未集不進景以正表爲南兖州刺史封南郡
王正表乃於歐陽立柵以斷援軍帥眾一萬聲言入援實欲
襲廣陵密書誘詢使燒城爲應詢以告南兖州刺史南康王
會理十二月會理使詢帥步騎千人夜襲正表大破之正表
走還鍾離詢收其兵糧歸就會理與之入援同上

侯景遣董紹先率兵襲廣陵南兖州刺史南康王會理以城降

之景以紹先爲南兖州刺史

梁書侯景傳

景以紹先爲江北行臺使齎敕召會理紹先至廣陵眾不滿
二百皆積日飢疲會理士馬甚盛僚佐說會理曰景已陷京

邑欲先除諸藩然後篡位若四方拒絕立當潰敗奈何委全
州之地以資寇手不如殺紹先發兵固守與魏連和以待其
變會理素懦卽以城授之紹先旣入眾莫敢動紹先悉收廣

陵文武部曲鎧仗金帛遣會理單馬還建康

通鑑梁紀十八

南康

王會理字長才爲使持節都督南北兗北徐青冀東徐譙七
州諸軍事平北將軍南兗州刺史侯景圍京邑會理治嚴將
入援會北徐州刺史封山侯正表謀襲廣陵會理擊破之方
得進路臺城陷侯景遣前臨江太守董紹先以高祖手敕召
會理係佐咸勸距之會理曰諸君心事與我不同天子年尊
受制賊虜今有手敕召我臣子之心豈得違背且遠處江北

功業難成不若身赴京都圖之肘腋遂席卷而行以城輸紹
先至京景以爲侍中司空兼中書令雖在寇手每思匡復時
范陽祖皓斬紹先據廣陵城起義期以會理爲內應皓敗辭
相連及景矯詔免會理官復與柳敬禮謀舉事遇害

梁書南
康王績

傳

安樂縣侯乂理慷慨慕立功名侯景內寇乂理聚客赴
南兖州隨兄會理入援及城陷又隨會理還廣陵因入齊爲
質乞師行二日會景遣董紹先據廣陵遂追獲之防嚴不得
與兄相見乃僞請先還都入辭母因謂其姊固安主曰兄若
至願使善爲計自勉勿顧以爲念前途亦思立效未知天命
何如耳至都以魏降人元貞忠正可以託孤乃以玉柄扇贈

之後祖皓起兵父理奔長蘆爲景所害元貞往收葬焉

南史梁武

帝諸子傳

案梁書無父理傳以此事屬之通理據南史云

通理字仲宣父理字季英梁書則云通理字季英又云通理

封建安侯侯景傳云建安侯賁所陽侯通理

柳敬禮傳亦云建安侯蕭賁彼此互異未詳

簡文帝大寶元年春正月前江都令祖皓起義襲廣陵斬賊南

兗州刺史董紹先侯景自帥水步軍擊皓二月景攻陷廣陵皓

等並見害

梁書簡文帝紀

祖皓志節慷慨有文武才略大同中爲江都令後拜廣陵太

守侯景陷臺城皓在城中將見害乃逃歸江西百姓感其遺

惠每相蔽匿廣陵人來疑說皓率勇士耿光等百餘人襲殺

景兗州刺史董紹先推前太子舍人蕭勔爲刺史結束魏爲

援馳檄遠近討景景大懼即日率侯子鑒等攻之城陷皓見

執被縛射之箭徧體然後車裂以徇城中無少長皆埋而射

之南史皓本傳案皓范陽道人具祖冲之傳霍儁廣陵令邵陵王綸率眾討

侯景敗績綸奔京口賊獲儁等來送城下徇之逼云已擒邵

陵王儁獨云王小小失利已全軍還京口城中但堅守援軍

尋至賊以刀毆之儁言辭顏色如舊景義而釋之事見梁書侯景傳

四月景以侯子鑒為南兖州刺史梁書侯景傳

十月齊遣其將辛術圍陽平景行臺郭元建率兵赴援術退同上

二年十一月景以郭元建為南兖州刺史太尉北行臺如故同上

三年三月王僧辯等進營於石頭城北景列陣挑戰僧辯率眾

軍奮擊大破之景乃以皮囊盛二子挂馬鞍與百餘騎東奔王
偉委臺城竄逸侯子鑒等奔廣陵

同上案此從帝紀載入大寶三年實景篡逆二年也

元帝承聖元年命王僧辯等東擊侯景南兗州刺史郭元建秦
郡戍主郭正買陽平戍主魯伯和行南徐州事郭子仲並據城
降王僧辯遣陳霸先將兵向廣陵受郭元建等降又遣使者往
安慰之諸將多私使別索馬仗會侯子鑒度江至廣陵謂元建
等曰我曹梁之深讎何顏復見其主不若投北可得還鄉遂皆

降齊

通鑑梁紀二十

高祖率眾出應接會景將郭元建奔齊納其部曲三千人而

還

陳書高祖紀上

夏四月齊主使大都督潘樂與郭元建將兵五萬攻陽平拔之

通鑑梁紀二十 案潘

樂北齊帝紀作潘相樂

樂爲南道大都督討侯景發石龍南度百餘里至梁涇州

北齊

書樂
本傳

王僧辯破侯景辛術招攜安撫城鎮相繼款附前後二十餘州

於是移鎮廣陵獲傳國璽送鄴

北齊書辛術傳 案
自北齊廣陵入於北齊

侯景之敗也以傳國璽自隨使其侍中趙思賢掌之思賢自

京口濟江遇盜從者棄之草間至廣陵以告郭元建元建取

之以與辛術術送之至鄴

通鑑梁
紀二十

七月廣陵僑民朱盛張象潛結兵襲齊刺史溫仲邕

陳書高
祖紀上

盛等遣使求援於陳霸先云已克其外城霸先使告僧辯僧
辯曰情偽未可測若審克外城亟須應援不爾無煩進軍使
未報霸先已濟江僧辯乃命武州刺史杜顗等助之會盛等
謀泄霸先因進軍圍廣陵齊主使告曰請釋圍必歸廣陵歷
陽兩城霸先引兵還京口江北之民從霸先濟江者萬餘口

通鑑梁

紀二十

三年春正月安東開府儀同三司陳霸先帥眾攻廣陵城

梁書
元帝

紀

六月齊冀州刺史段韶將兵趣廣陵陳霸先解圍走

通鑑梁紀
二十一

韶回赴廣陵陳武帝遁去追至楊子柵望揚州城乃還大獲

其軍資器物旋師宿預

北齊書
段部傳

陳

宣帝太建五年三月分命眾軍北伐以鎮前將軍開府儀同三

司吳明徹都督征討諸軍事五月癸酉陽平郡城降九月丙子

左衛將軍樊毅克廣陵楚子城

陳書宣帝紀 案自此廣陵復
入於陳 又案楚子城攻見後

金城

下

吳明徹別遣徐敬成爲都督乘金翅自歐陽引埭上泝江由廣

陵齊人皆城守弗敢出自繁梁湖下淮圍淮陰城仍監北兗州

淮泗義兵相率響應

陳書徐敬成傳 案
繁梁湖當卽樊良湖

周羅暉從吳明徹與齊師戰於江陽流矢中其左目

隋書周
羅暉傳

六年春正月壬申廣陵金城降

陳書宣帝紀 案楚子城金城今皆未詳所在雍正志謂在魏

東豫州之廣陵攷魏書地形志東豫州治廣陵城又豫州廣陵郡下云興和中分東豫州置領宋安光城安蠻新蔡汝南凡五縣陳書宣帝紀云宣毅司馬湛陀克新蔡城隋書地理志弋陽郡下有定城殷城固始皆云後齊置新蔡郡其同郡之樂安卽宋安光城二縣是當時陳師固至東豫州矣然於此二城終無實證又隋志江都郡江陽下云舊曰廣陵後齊置廣陵江陽二郡開皇初郡廢則北齊以後之廣陵實在今之揚州而魏所僞置之廣陵已廢故隋志不及之足知陳書所載決不在彼今存之以俟攷

四月辛丑詔青齊舊隸膠光部落久患凶戎爭歸有道饑饉疾

疫不免流離可遣大使精加慰撫仍出陽平倉穀拯其懸磬並

充糧種勸課士女隨近耕種石髓等屯適意修墾

同上

七年三月詔豫二充譙徐合霍南司定九州及江北諸郡置雲

旗義士往大軍及諸鎮備防

同上

九年冬十月上聞周人滅齊欲爭徐兗詔南兗州刺史司空吳

明徹督諸軍伐之以其世子戎昭將軍惠覺攝行州事

通鑑陳紀七

十年二月吳明徹圍周彭城列舟艦於城下攻之甚急王軌引

兵輕行據淮口遏陳船歸路明徹決堰乘水勢退軍至清口水

勢漸微舟艦並礙王軌圍而蹙之眾潰明徹爲周人所執將士

三萬並器械輜重皆沒於周

同上

十一年周以鄖公韋孝寬爲行軍元帥帥行軍總管杞公亮邸

公梁士彥寇淮南十一月梁士彥拔廣陵

同上

周軍進圍壽陽以車騎將軍開府儀同三司南兗州刺史淳于

量爲上流水軍都督前豐州刺史皋文奏率步騎三千趣陽平

郡十二月南北充晉三州及盱眙山陽陽平馬頭秦歷陽沛北

譙南梁等九州並自拔還京師

陳書宣帝紀案自此廣陵入於周

十二年七月陳紀蕭摩訶等攻廣陵周吳州總管于顗擊破之

通鑑陳

紀八

廣陵人杜喬生聚眾反刺史元義討平之

隋書文帝紀上

八月遣通直散騎常侍超武將軍陳慧紀爲前軍都督趣南充

州九月周廣陵義主曹藥率眾入附

陳書宣帝紀

十三年

隋文帝開皇元年

隋以上開府儀同三司賀若弼爲吳州總管

鎮廣陵

通鑑陳紀九案是年隋受周禪廣陵入於隋

後主至德元年

隋開皇二年

賀若誼封海陵郡公

隋書誼本傳案誼封之年據傳當

此在

禎明二年

隋開皇八年

十一月隋遣晉王廣衆軍來伐自巴蜀沔漢

下流至廣陵數十道俱入緣江鎮戍相繼奏聞

陳書後主紀

三年春正月

隋開皇九年

隋總管賀若弼自北道廣陵濟京口

同上

先是弼以老馬多買陳船而匿之買弊船五六十艘置於濱

內陳人覘之以爲內國無船弼又請緣江防人每交代之際

必集廣陵於是大列旗幟營幕被野陳人以爲隋兵大至急

發兵爲備旣知防人交代其眾復散後以爲常不復設備又

使兵緣江時獵人馬喧譟故弼之濟江陳人不覺

通鑑隋紀一案隋

書賀若弼傳廣陵
作歷陽疑傳寫誤

隋

文帝開皇十年十一月江南高智慧等作亂徙上爲揚州總管

鎮江都每歲一朝

隋書煬帝紀上 案智慧作亂年月從文帝紀編入

十八年廣陵郡公韓僧壽進爵江都郡公

隋書僧壽本傳 案僧壽封廣陵在開皇

初年月無攷

煬帝大業元年三月發河南諸郡男女百餘萬開通濟渠自西苑引穀洛水達於河自板渚引河通於淮遣黃門侍郎王宏上儀同千士澄往江南採木造龍舟鳳舳黃龍赤艦樓船等數萬艘八月壬寅上御龍舟幸江都以左武衛大將軍郭衍爲前軍

右武衛大將軍李景爲後軍文武官五品以上給樓船九品以

上給黃篋舳舻相接二百餘里

隋書楊帝紀上

尙書右丞皇甫議又發淮南民十餘萬開邗溝自山陽至楊子入江渠廣四十步渠旁皆築御道樹以柳自長安至江都置離宮四十餘所遣王宏等往江南造龍舟雜船東京官吏督役嚴急役丁死者什四五

通鑑隋紀四

上行幸江都發顯仁

宮王宏遣龍舟奉迎上御小朱航自漕渠出洛口御龍舟龍舟四重高四十五尺長二百尺上重有正殿內殿東西朝堂中二重有百二十房皆飾以金玉下重內侍處之皇后乘翔螭舟制度差小而裝飾無異別有浮景九艘三重皆水殿也

又有漾彩朱鳥蒼螭白虎元武飛羽青鳧陵波五樓道場元
壇樓船板船黃篾等數千艘後官諸王公主百官僧尼道士
蕃客乘之及載內外百司供奉之物共用挽船士八萬餘人
其挽漾彩以上者九千餘人謂之殿脚皆以錦綵爲袍又有
平乘青龍艤舳舨八櫂艇舸等數千艘並十二衛兵乘之
并載兵器帳幕兵士自引不給夫舳舨相接二百餘里照耀
川陸騎兵翊兩岸而行旌旗蔽野所過州縣五百里內皆令
獻食多者一州至百輿極水陸珍奇後宮厭飫將發之際多
棄埋之

同上

二年二月定輿服儀衛制度以開府儀同三司何稠爲太府少

卿使之營造送江都帝每出羽儀填街溢路亘二十餘里

同上

稠參會古今多所損益袞冕畫日月星辰皮弁用漆紗爲之
又作黃麾三萬六千人仗及輅輦車輿皇后鹵簿百官儀服
務爲華盛以稱上意課州縣送羽毛民求捕之網羅被水陸
禽獸有堪髦毼之用者殆無遺類所役工十萬餘人用金銀

錢帛鉅億

同上

三月庚午上發江都

同上

六年三月幸江都宮六月制江都太守秩同京尹

隋書楊
帝紀上

初帝欲大營汾陽宮令御史大夫張衡具圖奏之衡承閒進
諫帝意甚不平乃出爲榆林太守久之衡督役築樓煩城因

帝巡幸得謁帝惡衡不損瘦以爲不念咎復遣之榆林未幾
敕衡督役江都宮禮部尙書楊元感使至江都衡謂元感曰
薛道衡真爲枉死元感奏之江都郡丞王世充又奏衡頻減
頓具帝於是發怒鎮詣江都市將斬之久乃得釋除名爲民
以王世充領江都宮監世充性譎詐有口辨帝數幸江都世
充能伺候顏色爲阿諛雕飾池臺奏獻珍物由是有寵通鑑
隋紀

五

七年二月己未上升釣臺臨楊子津大宴百寮頒賜各有差乙

亥上自江都御龍舟入通濟渠遂幸涿郡

隋書煬
帝紀上

九年八月吳郡朱燮晉陵管崇聚眾寇掠江左命虎牙郎將趙

六兒將兵萬人屯楊子分爲五營以備南賊崇遣其將陸顗度

江夜襲六兒破其兩營收器械軍資而去

通鑑隋紀六

時朱燮管崇擁眾十餘萬帝遣將軍吐萬緒魚俱羅討之不

能克充募江都萬餘人擊頻破之

隋書王充傳案充卽王世充省世字避唐諱

劉元進據建安遣江都丞王世充發淮南兵數萬人討之

通鑑隋紀

六

杜伏威轉掠淮南自稱將軍

舊唐書伏威本傳

伏威與輔公祏爲刎頸交俱亡命爲羣盜時年十六常出則

居前入則殿後其黨服之共推爲主下邳苗海潮亦聚眾爲

盜伏威使公祏謂之曰今各興大義力分勢弱何不合以爲

強則不患隋軍相制公能為主吾當敬從自揆不堪可來聽
命海潮懼卽以其眾歸伏威江都留守遣校尉朱顥討之伏
威與戰陽爲奔北引入葭葦中而從上風縱火步騎陷大澤
皆燒死海陵賊帥趙破陳聞伏威兵少輕之召與并力伏威
令公祐嚴兵居外以待變親將十人持牛酒入謁於坐斬破
陳并其眾由此兵威稍盛復屠安宜

同上

十年十二月賊帥孟讓眾十餘萬據都梁宮遣江都郡丞王世

充擊破之盡虜其眾

隋書煬帝紀下

孟讓據都梁宮阻淮爲固棧潛於下流而濟至江都襲破讓

北史

陳陵
傳

十一年突厥圍帝於雁門世充盡發江都人往赴難在軍中垢

面悲泣曉夜不解甲藉草而坐帝益信任之

北史王世充傳

楊元感之亂龍舟水殿皆爲所焚詔江都更造凡數千艘制度

更大於舊者

通鑑隋紀六

冬十月東海賊帥李子通擁眾度淮自號楚王建元明政寇江

都

隋書煬帝紀下

子通有勇力先依長白山賊帥左才相羣盜皆殘忍而子通

獨寬仁由是人多歸之未半歲有眾萬人才相忌之子通引

去度淮與杜伏威合伏威選壯士爲假子凡三十餘人王雄

誕闕校爲之冠旣而子通謀殺伏威遣兵襲之伏威被重創

墜馬雄誕負之逃葭葦中收散兵復振將軍來整擊破之伏威逃免整又擊子通破之子通帥其餘眾奔海陵復收兵得

二萬人自稱將軍

通鑑隋紀六

十二年秋七月甲子幸江都宮九月東海人杜伏威揚州沈覓

敵等作亂眾至數萬右禦衛將軍陳棱擊破之

隋書煬帝紀下

江都新作龍舟成送東都宇文述勸幸江都帝從之以詩留

別宮人曰我夢江都好征遼亦偶然是時李子通據海陵左

才相掠淮北杜伏威屯六合眾各數萬帝遣光祿大夫陳棱

將宿衛精兵八千討之往往克捷

通鑑隋紀七

帝至江都江淮

郡官謁見者專問禮餉豐薄豐則超遷丞守薄則率從停解

江都郡丞王世充獻銅鏡屏風遷通守歷陽郡丞趙元楷獻異味遷江都郡守由是郡縣競務刻剝以充貢獻民外爲盜賊所掠內爲郡縣所賦生計無遺加之饑饉無食民始采樹皮葉或擣葉爲末或煮土而食之諸物皆盡乃自相食而官食猶充物吏皆畏法莫敢振救王世充密爲帝簡閱江淮民間美女獻之由是益有寵

同上

十三年

卽恭帝義寧元年

春正月杜伏威破高郵引兵據歷陽自稱總

管

同上

伏威與虎牙郎將公孫上哲戰歸城覆其軍帝命陳棱討之棱不敢戰伏威遣以婦人服書稱陳姥怒其軍棱果悉兵至

伏威出戰，棧軍大潰，棧走而免。進破高郵，引兵攻歷陽，據之。

稱總管分兵徇屬縣，皆下。江淮羣盜爭附。

新唐書杜伏威傳

九月，帝括江都人女寡婦以配從軍。

隋書煬帝紀下

驍果從煬帝在江都者多逃亡。帝患之，以問裴矩。對曰：「人情非有匹偶，難以久處。請聽軍士於此納室。」帝從之，悉召境內寡婦處女，集宮下，恣將士所取。或先與姦者，聽自首，卽以配之。

通鑑隋紀八

遣攝江都郡丞馮慈明向東都翟讓殺之。同上

馮慈明字無佚，信都長樂人。大業十三年，攝江都郡丞李密逼東都，詔慈明安集廛洛，爲密黨所執。密延坐，謂曰：「隋祚已

盡區宇沸騰今欲率四方之眾問罪江都卿以爲何如慈明曰慈明直道事人有死而已不義之言非所敢對密不悅慈明潛使人奉表江都及致書東都留守論賊形勢密知其狀義而釋之出至營門賊帥翟讓亂刀斬之贈昌黎郡公諡壯

武

隋書慈明本傳

恭帝義寧二年三月右屯衛將軍宇文化及武賁郎將司馬德戡元禮監門直閤裴虔通將作少監宇文智及武勇郎將趙行樞鷹揚郎將孟景內史舍人元敏符璽郎李覆牛方裕千牛左右李孝本孝質直長許宏仁薛世良城門郎唐奉義醫正張愷等以驍果作亂入犯宮闕上崩於溫室時年五十蕭后令官人

撤牀簀爲棺以埋之化及發後右禦衛將軍陳棱奉梓官於成

象殿葬吳公臺下大唐平江南之後改葬雷塘

隋書煬帝紀下

宇文化及殺太上皇於江都宮右禦衛將軍獨孤盛死之齊王

暕趙王杲燕王倓開府儀同三司行右翊衛大將軍宇文協內

史侍郎虞世基御史大夫裴蘊行給事郎許善心皆遇害化及

立秦王浩爲帝自稱大丞相朝士文武皆受其官爵宿公麥才

折衝郎將沈光同謀討賊夜襲化及營反爲所害

隋書恭帝紀案麥才當

作麥孟才
疑傳刻脫

煬帝至江都荒淫益甚官中爲百餘房各盛供張實以美人
日令一房爲主人江都郡丞趙元楷輩供酒饌常與蕭后及

幸姬歷就宴飲酒卮不離口從姬千餘人亦常醉然帝見天下危亂意亦擾擾不自安退朝則幅巾短衣策杖步遊徧歷臺館非夜不止汲汲顧景惟恐不足自曉占候卜相好爲吳語常夜置酒仰視天文謂蕭后曰外間大有人圖儂然儂不失爲長城公卿不失爲沈后且其樂飲耳因引滿沈醉又嘗引鏡自照顧謂蕭后曰好頭頸誰當斫之帝見中原已亂無心北歸欲都丹陽保據江東乃命治丹陽宮將徙都之時江都糧盡從駕驍果多關中人久客思鄉里見帝無西意多謀叛歸卽將寶賢遂帥所部西走帝遣騎追斬之而亡者猶不止帝患之虎賁郎將扶風司馬德戡素有寵於帝帝使領驍

果屯於東城德戡與所善虎賁郎將元禮直閣裴虔通謀曰
今饒果人人欲亡我欲言之恐先事受誅不言於後事發亦
不免族滅奈何又聞關內淪沒李孝常以華陰叛上囚其二
弟欲殺之我輩家屬皆在西能無此慮乎二人皆懼曰然計
將安出德戡曰饒果若亡不若與之俱去二人皆曰善因轉
相招引內史舍人元敏虎牙郎將趙行樞鷹揚郎將孟秉隋書
作景告符璽郎李覆牛方裕直長許宏仁薛世良城門郎唐
避唐諱奉義醫正張愷勳侍楊士覽等皆同謀日夜相結約於廣座
明論叛計無所畏避有宮人白蕭后后曰任汝奏之宮人言
於帝帝大怒以爲非所宜言斬之其後宮人復白后后曰天

下事一朝至此無可救者何用言之徒令帝憂耳自是無復
言者趙行樞與宇文智及素厚楊士覽智及之甥二人以謀
告智及智及大喜德戡等期以三月望日結黨西遁智及曰
主上雖無道威令尙行卿等亡去正如竇賢取死耳今天實
喪隋英雄並起同心叛者已數萬人因行大事此帝王之業
也德戡等然之行樞世良請以智及兄化及爲主結約既定
乃告化及化及性驚怯聞之變色流汗旣而從之德戡使宏
仁愷入備身府告所識者云陛下聞驍果欲叛多醢毒酒欲
因享會盡鴆殺之獨與南人留此驍果皆懼轉相告語反謀
益急乙卯德戡悉召驍果軍吏諭以所爲皆曰惟將軍命是

日風霾晝昏晡後德戡盜御殿馬潛厲兵刃是夕元禮裴虔通直閣下專主殿內唐奉義主閉城門與虔通相知諸門皆不下鍵至三更德戡於東城集兵得數萬人舉火與城外相應帝望見火且聞外誼器問何事虔通對曰草房失火外人其救之耳時內外隔絕帝以爲然智及與孟秉於城外集千餘人劫候衛虎賁馮普樂布兵分守衢巷燕王倓覺有變夜穿芳林門側水竇而入至元武門詭奏曰臣猝得中風命懸俄頃請得面辭虔通等不以聞執囚之丙辰天未明德戡虔通兵以代諸門衛士虔通自門將數百騎至成象殿宿衛者傳呼有賊虔通乃還閉諸門獨開東門驅殿內宿衛者令

出皆投仗而走右屯衛將軍獨孤盛謂虔通曰何物兵形勢
太異虔通曰事勢已然不預將軍事將軍慎毋動盛大罵曰
老賊是何物語不及被甲與左右十餘人拒戰爲亂兵所殺
千牛獨孤開遠帥殿內兵數百人詣元覽門叩閣請曰兵仗
尙全猶堪破賊陛下若出臨戰人情自定不然禍今至矣竟
無應者軍士稍散賊執開遠義而釋之先是帝選驍健官奴
數百人置元武門謂之給使以備非常待遇優厚至以官人
賜之司官魏氏爲帝所信化及等結之使爲內應是日魏氏
矯詔悉聽給使出外倉卒之際無一人在者德戡等引兵自
元武門入帝聞亂易服逃於西閣虔通與元禮進兵排左閣

魏氏啟之遂入承巷問陛下安在有美人出指之校尉令狐
行達拔刀直進帝映窗扉謂行達曰汝欲殺我耶對曰臣不
敢但欲奉陛下西還耳因扶帝下閣虔通本帝爲晉王時親
信左右也帝見之曰卿非我故人乎何恨而反對曰臣不敢
反但將士思歸欲奉陛下還京師耳帝曰朕方欲歸正爲上
江米船未至今與汝歸耳虔通因勒兵守之至旦孟秉以甲
騎迎化及化及戰栗不能言人有來謁之者但俛首據鞍稱
罪過化及至城門德載迎謁引入朝堂號爲丞相虔通謂帝
須親出慰勞進其從騎通帝乘之帝嫌鞍勒敝更易新者乃
乘之虔通執轡挾刀出宮門賊徒喜譟動地化及揚言曰何

用持此物出亟還與手帝問世基何在賊黨馬文舉曰已梟
首矣於是引帝還至寢殿虔通德戡等拔白刃侍立帝歎曰
我何罪至此文舉曰陛下違棄宗廟巡遊不息外勤征討內
極奢淫使丁壯盡於矢刃女弱填於溝壑四民喪業盜賊蜂
起專任佞諛飾非拒諫何謂無罪帝曰我實負百姓至於爾
輩榮祿兼極何乃如是今日之事孰爲首邪德戡曰溥天同
怨何止一人化及又使封德彝數帝罪帝曰卿士人何爲亦
爾德彝赧然而退帝愛子趙王杲年十二在帝側號慟不已
虔通斬之血濺御服賊欲弑帝帝曰天子死自有法何得加
以鋒刃取鵠酒來文舉等不許使令狐行達頓帝令坐帝自

解練巾授行達縊殺之初帝自知必及於難常以罌貯毒藥自隨謂所幸諸姬曰若賊至汝曹當先飲之然後我飲及亂顧索藥左右皆逃散竟不能得蕭后與宮人撤漆牀板爲小棺與趙王杲同殯於西苑流珠堂帝每巡幸常以蜀王秀自隨囚於驍果營化及弑帝欲奉秀立之衆議不可乃殺秀及其七男又殺齊王暕及其二子并燕王倓隋氏宗室外戚無少長皆死惟秦王浩素與智及往來且以計全之齊王暕素失愛於帝恒相猜忌帝聞亂顧蕭后曰得非阿孩耶化及使人就第誅暕暕謂帝使收之曰詔使且緩兒兒不負國家賊也至街中斬之暕竟不知殺者爲誰父子至死不相明又殺

內史侍郎虞世基御史大夫裴蘊左翊衛大將軍來護兒秘書監袁充右翊衛將軍宇文協千牛宇文昂梁公蕭鉅等及其子難將作江陽長張惠紹馳告裴蘊謀矯詔發郭下兵收化及等扣門援帝議定遣報虞世基世基疑告反者不實抑而不許須臾難作蘊歎曰謀及播郎竟誤人事世基宗人伋謂世基子熙曰事勢已然吾將濟卿南度同死何益熙曰棄父背君求生何地感尊之懷自此決矣世基弟世南抱世基號泣請以身代化及不許黃門侍郎裴矩知必將有亂雖廝役皆厚遇之又建策爲驍果娶婦及亂作皆曰非裴黃門之罪旣而化及至矩迎拜馬首故得免以蘊威不預朝政亦免

之百官詣朝堂賀給事中許善心獨不至許宏仁馳告之曰
天子已崩宇文將軍攝政文武咸集天時人事自有代終何
預於叔而低回若此善心怒不肯行宏仁泣而去化及遣人
就家擒至朝堂旣而釋之不舞蹈而出化及怒曰此人大負
氣復命擒還殺之其母范氏年九十二撫柩不哭曰能死國
難吾有子矣因臥不食十餘日而卒

通鑑唐紀一

化及以左武

衛將軍陳棱爲江都太守綜領留事令內外戒嚴云欲還長
安皇后六宮皆依舊式爲御營營前別立帳化及視事其中
仗衛部伍皆擬乘輿奪江都人舟楫取彭城水路西歸以折
衝郎將沈光驍勇使將給使營於禁內行至顯福宮虎賁郎

將麥孟才虎牙郎錢傑與光謀曰吾儕受先帝厚恩今俛首
事讐受其驅帥何面目視息世閒哉吾必殺之死無所恨光
泣曰是所望於將軍也孟才乃糾合恩舊帥所將數千人期
以晨起將發時襲化及語洩化及夜與腹心走出營外留人
告德載等使討之光聞營內誼知事覺卽襲化及營空無所
獲值元敏數而斬之德載引兵入圍之殺光其麾下數百人
皆闕死一無降者孟才亦死

同上

宇文化及引軍北上召棱守江都棱集眾縞素爲煬帝發喪備

儀衛改葬於吳公臺下衰杖送喪慟感行路

北史陳
棱傳

棱求得煬帝柩取化及所留輦路鼓吹粗備天子儀衛改葬

於江都宮西吳公臺下其王公以下皆列瘞於帝堊之側通鑑

唐紀

二

廣陵事略卷之二